



Sabtu, 5 Desember 2020

Ogen: Jeremia 40:1-6



Nentuken Pilihan



Iperluken kal hikmat ras kepentaren tupung ibereken man banta sada pilihan. Sabab tep-tep pilihan lit nge resiko si man alanken. Tupung kita nguda, ibereken kesempatan milih teman geluh, melala kal si bahan pertimbangan-pertimbangenna, adi ras si A bagenda pagi jadina, adi ras si B beda ka ras si A ras seterusnya. Kerina lit kelebihan ras kekurangenna, i bas nentukan pilihan la sitik perbebenta turah. Bageme teks renungenta enda si idah maka man Jeremia, ibereken Nebusaradan puanglima raja Nebukadneser sada pilihan lako tetap ras Nebusaradan mulih ku Babel entah mulihken ku rumah Gedalya si enggo iangkat Nebukadneser jadi Gubuernur Juda janah tetap tading ras bangsa Israel si tading la ikut iangkut ku Babel. Tapi Jeremia sinik saja, la itentukenna pilihenna, emaka isuruh Nebusaradan ia mulihken ku rumah Gedalya ras tading i tengah-tengah masyarakat Juda. Kedungenna Jeremia pe berkat ndahi Gedalya, tading ia ras bangsa Israel si tading denga i Juda.

Adi rukur-rukur kita, engkai maka Jeremia enda ibebasken Raja Nebukadneser, adi teman-temanna si debanna enggo iangkut ku Babel? Lit pengakap maka Raja Nebukadneser meggi nubuat Nabi Jeremia nandangi bangsa Israel kerna ukumen si la banci la jadi erkiteken dosa bangsa Israel man Tuhan. Megombang ia man Tuhan alu nembah dibata-dibata si deban, itundalkenna Tuhan alu mindo penampat man bangsa Mesir. Tempa gegehen bangsa-bangsa doni enda nampati ia asangkan Dibata si enggo milih Israel jadi bangsaNa. Arah sie pengakap Nebukadneser maka Jeremia enggo erpihak man bana, Jeremia enggo pro-Babel. Ipulahina ras ibebaskenna Jeremia, ku ja atena, kai atena ibahanna lanai iambati raja. Ibereken raja pe nakan guna encukupi keperlunna bas perdalanen.

Banci siidah maka Jeremia pangen akapna tading ras rakyat Juda, amin pe si tading e kalak si musil-musil ras erpendidikan rendah asangkan ikut mulihken ku Babel ras bangsana si cendikiawan. Kesetianna man Tuh an teridah arah kesetianna ngepkep sisa bangsa Israel si tading i Juda. Kalak si setia man Tuhan tetap ipekenakenaNa, labo pediatNa nggeluh i bas kekuranganen.

